



發願文

諸佛如來，普門大悲願王，俯垂證鑒。令弟子眾等，與法界眾生，三業六根，無始所作，現在當作，自作教他，見聞隨喜，若憶不憶，若識不識，若疑不疑，若覆若露，大小輕重，一切諸罪，畢竟清淨。我懺悔已，六根三業，淨無瑕累，十因六報，七趣情想，消滅無餘。

仰冀洪慈，冥薰加庇。使弟子眾等，與法界眾生，內外障緣寂滅，自他行願圓成。開本知見，制諸魔外。現生之內，心無煩惱，身無病苦。三災八難永得消除。衣食豐饒，正信三寶。閱經聞教，過目不忘。一聞千悟，得大總持。三業隨智，莊嚴律儀。於妙禪那，覺悟無惑。圓破五陰，圓超五濁。常演大乘，深達實相。辯才無礙，契理契機。捨此報身，更無他趣，決定往生極樂世界。至臨命終，預知時至，親覲阿彌陀佛俯垂接引。高預海會，得受記莚。然後不違安養，回入娑婆。分身塵刹，逐類隨形，暢說一乘真實之道。以此楞嚴法門，及法華經，開示未學。令諸眾生，獲妙微密，性淨明心，得清淨眼。凡見我形，聞我名者，永離災難，發菩提心。聆我法者，得正遍知，旋性顛倒，直趣菩提，中無迂曲。又願我等，智慧如文殊，行願如普賢，慈悲如觀音，神力如勢至，孝行如地藏，莊嚴淨土，如彌陀世尊，極樂無異。塵劫演揚，如釋迦如來。與諸眾生，同到如來一乘寂滅場地。如是三惑頓空，三業清淨，三障消除，三因圓發，三觀圓明，三諦圓顯，三德圓證，三身圓彰，三有齊資，四恩總報。虛空有盡，我願無窮。法界眾生，同圓種智。